

22 NOV 1996

ANWAR UCAP SELAMAT PULANG KEPADA FUJIMORI

KUALA LUMPUR, 22 Nov (Bernama) -- Timbalan Perdana Menteri Datuk Seri Anwar Ibrahim malam ini mengucapkan selamat pulang kepada Presiden Peru Alberto Fujimori di Lapangan Terbang Sultan Abdul Aziz Shah, Subang.

Fujimori, yang mengakhiri lawatan rasmi tiga hari ke Malaysia, berlepas ke Tokyo bersama-sama anggota rombongan termasuk beberapa orang menteri kabinet dan pemimpin korporat.

Yang turut berada di lapangan terbang ialah Menteri Pembangunan Luar Bandar Datuk Annuar Musa, yang juga Pemangku Menteri Luar, dan Menteri Tanah dan Pembangunan Koperasi Datuk Osu Sukam, selaku Menteri Pengiring.

Fujimori, yang tiba di sini Rabu lepas, mengadap Yang di-Pertuan Agong Tuanku Ja'afar di Istana Negara dan berbincang dengan Perdana Menteri Datuk Seri Dr Mahathir Mohamad mengenai hubungan dua hala yang merangkumi perdagangan, kerjasama pelaburan dan isu antarabangsa.

Lawatan Fujimori juga menghasilkan beberapa Memorandum Persefahaman dan perjanjian antara sektor swasta Peru dan Malaysia.

Beliau juga melawat projek pembangunan tanah Felda Serting Hilir di Negeri Sembilan dan dianugerahi Ijazah Kehormat Doktor Sains oleh Universiti Pertanian Malaysia.

-- BERNAMA

MS AHH